

# बुझल-बुझल

नं.सं. ११११

**Souvenir**  
**2015 AD**



**ज्यापु समाज, यल**

भोलगणेश, यल-९

पो.ब.नं. २०४,

फोन : ५५४४५८७, ५५४४८४४, फ्याक्स : ९७७-५५४४८५७

E-mail : [info@jyapusamaj.org.np](mailto:info@jyapusamaj.org.np), Website : [www.jyapusamaj.org](http://www.jyapusamaj.org).

# विलियम कर्कप्याट्रिक व वय्कःया सफूः An Account of the Kingdom of Nepaul

रवि शाक्य, इखाछै, यल ।



*"History has been assigned the future of judging the past, of instructing the present for the benefit of future ages" - Leopold von Ranke*

प्राचीनकालय् इतिहास धैगु साहित्यया छगू ब्व जक जुयाच्वंगु खः । मनूतय्त आनन्द बीगु, मनूतय्गु मनोरञ्जनया साधनया रूपय् जक इतिहासयात छयलाच्वंगु खः । उकिं न्हापाया इतिहासय् वास्तविक खँ नापनापं काल्पनिक खँत नं दुध्याकातइगु खः । प्राचीनकालनिसँ इतिहासया अध्ययनयात महत्व बिचाः पठनपाठन जुयावयाच्वंगु खंकेफु । विशेष यानाः भविष्यय् देसया राज्यसत्ता न्ह्याकीपिं राजकुमारतय्त इतिहासया शिक्षा अनिवार्य यानातःगु खः । कौटिल्यया अर्थशास्त्रया न्हापांगु अधिकरण 'विनयाधिकारिक'या न्यागूगु अध्याय 'वृद्ध संयोग'य् ध्यातःगु दु -

पूर्वमहर्भागं हस्त्यश्वरथप्रहरणविद्यासु विनयं गच्छेत् ॥१२॥ पश्चिममितिहासश्रवणे ॥१२॥

(शास्त्री, २००९: १६)

(राजकुमारं न्हिनसिया न्हापांगु भागय् किसि, सल, रथ अस्त्रविद्याया तालिम काय्माः, लिपांगु भागय् इतिहासया अध्ययन याय्माः ।)

न्हापाया इतिहासय् वास्तविक तथ्य व काल्पनिक खँया दथुइ भेद क्यने थाकु । उकिं लिपा इतिहास अध्ययनया वैज्ञानिक पद्धति विकास जुयावःलिसे साहित्यनाप इतिहासया स्वापू तापानावन । निगू अलग-अलग विधाया रूपय् विकास जुल । साहित्य धैगु आत्मपरक विधा व इतिहास धैगु वस्तुपरक विधाया रूपय् स्थापित

जुयावन । ईशाया १९ गूगु शताब्दीइ वयाः तथ्यपूर्ण खँयात जक दुध्याकाः इतिहास तयार याय्गु वैज्ञानिक पद्धतिया विकास जुल । वैज्ञानिकरूपं इतिहास च्वय्गु ज्याय् जर्मनी दकलय् न्ह्यःने लाःवन ।

नेपालय् यक्व न्हापानिसँ इतिहास च्वय्गु परम्परा न्ह्यानाच्वंगु खंकेफु । लिच्छविकालय् जुजुपिसं शिलालेख तइबलय् थः पुर्खापिनि वंशावली च्वाकवंगु दु । थ्व परम्परायात मल्ल जुजुपिसं नं अनुकरण यानावन । अथे हे वंशावली च्वय्गु, घटनावली टिपोट यानातय्गु परम्परा नं न्ह्यानाच्वन । नेपाः वःपिं चिनियाँ यात्री, इशाई धर्म प्रचार याय्त वःपिं मिशनरीया मनूतय्सं नं नेपाःबारे च्वावांगु दु तर वैज्ञानिकरूपं इतिहास च्वय्गु ज्या यक्वलिपा तिनि शुरु जुल ।

नेपालया इतिहास च्वाः दकलय् न्हापां सफूया रूपय् पिकाय्गु ज्या छम्ह बेलायती नागरिक William Kirkpatrick पाखें जुल । उगु सफूया पूरा नां *An Account of the Kingdom of Nepaul, Being the Substance of Observations Made During a Mission to That Country in the Year 1793* खः । ईसं १८११ स लण्डनया William Miller पाखें नेपाःया इतिहासबारेया न्हापांगु ग्रन्थ पिहांवःगु खः । कर्कप्याट्रिकबारे छुं ईन्ह्यःतक पर्याप्त जानकारी मदुगु खः । तर William Dalrymple या सफू

*White Mughals: Love and betrayal in Eighteenth Century India* (२००२) पिहांवसैलि कर्कप्याट्रिकबारे आपालं न्हूगु खँ प्रकाशय् वःगु दु । औपन्यासिकशैलीं च्वयातःगु थुगु सफुली १८ गूगु शताब्दीपाखे भारतय् राज्य संचालन यानाच्चपिं अंग्रेज शासकतयगु जीवनशैली न्त्यब्वयाः अंग्रेज व मुगलतयगु दथुइ जूगु घात-प्रतिघातया चित्रण यानातःगु दु । कर्कप्याट्रिकया जन्म ईसं १७५४ पाखे जूगु खः । मां-बौया इहिपा मजुइक हे वय्कःया जन्म जूगु खः । वय्कःया मां सु धकाः नं सीमदुनि । बौम्हसिनं वय्कःयात आयरलाण्डया बोर्डिङ्ग स्कूलय् तयाबिल । ईसं १७७१ स वय्कलं इष्ट-इण्डिया कम्पनीइ जागीर नयादिल । वय्कःया न्हापांगु पदस्थापना मद्रासया घोडचढी फौजय् जूगु खः । ईसं १७८६ स मराठा सरदार माधवजी सिन्धियाया दरवारय् कम्पनी सरकारपाखें रेजिडेन्ट नियुक्त जुल । तर सिन्धियानाप वय्कःया सम्बन्ध बांलाः मजुल । वय्कलं पूर्वीय भाषा, संस्कृति, कानूनया बारे नं अध्ययन यानादीगु खः । व हे कारणं कम्पनी सरकारं नेपाल-तिब्बत युद्धय् मध्यस्थ याय्त वय्कःया नेतृत्वय् टोली छ्वयाहःगु खः । उगु मिशनयात 'कर्कप्याट्रिक मिशन' नं धाय्गु याः । कर्कप्याट्रिक गुज्वःगु राजनीतिक परिस्थितिइ नेपाः वल धैगु सीकेत नेपाल व तिब्बतया दथुइ जूगु युद्धया पृष्ठभूमि थुइकेगु आवश्यक जुइ ।

नेपाः व तिब्बतया दथुइ व्यापारिक सम्बन्ध बांलानाच्चंगु इलय् तिब्बत सरकारं नेपाःया व्यापारीतय्के काइगु करय् बृद्धि यानाबिल । हाकनं तिब्बतं नेपालय् छ्वयाहइगु चिइ धू ल्वाकछ्याय्गु यानाहल । न्हापानिसं नेपाल व तिब्बतया दथुइ मुद्राया खँय् विवाद जुयाच्चंबलय् थुपिं निता कारणं यानाः निगू देय्दथुइ वैमनस्यता ब्वलन (अमात्य, १९६९: ३) । फलस्वरूप ईसं १७९२ स नेपाल व तिब्बतदथुइ युद्ध जुल । दलाई लामां

चीनया बादशाहयाके ग्वाहालि फ्वन । नेपालं नं चीनया सेनानाप ल्वाय्मालीगुलिं इष्ट-इण्डिया कम्पनीयाके ग्वाहालि फ्वन । नेपाल अतिकं रमणीय, अपार सम्भावनाया भण्डार, रहस्यमयी स्वर्णभूमि धकाः प्रचार जुयाच्चंगुलिं थ्व देसयात गुकथं थःगु ल्हातय् काय्गु धकाः विचाः यानाच्चपिं अंग्रेजत नेपाःया इनाप खनाः लय्ताल । मेखे नेपालयात ग्वाहालि यातकि चीननाप जुयाच्चंगु व्यापारय् नकारात्मक प्रभाव लाइ धकाः नं ग्यात । दलाई लामां १ मार्च १७९२ स युद्धय् नेपालयात ग्वाहालि याय्मते धकाः कम्पनी सरकारयात पौ च्वल । उज्वःगु सम्बेदनशील इलय् इष्ट-इण्डिया कम्पनीपाखें ग्वाहालि काय्त बहादुर शाहं १ मार्च १७९२ स कम्पनी सरकारनाप छगू वाणिज्य सन्धिइ हस्ताक्षर यात (गौतम, २०५१: ३३८) । वास्तवय् चीननाप युद्ध याय्त अंग्रेजतय्के आवश्यक हातहतियार न्यायदइला धैगु आशां बहादुर शाहं उगु वाणिज्य सन्धि याःगु खः । तर अंग्रेजतय्सं चीननापया सम्बन्ध स्थानी धकाः ग्यानाः नेपाःयात हतियार उपलब्ध याकेगुली तत्परता मक्यं । नेपालं अंग्रेज पदाधिकारीतय्त "जिमिसं ध्यबासहित पटनाय् मनु छ्वयाहय्, हतियार उपलब्ध यानाब्यु" धकाः पत्र च्वल । अथेसां अंग्रेजतय्सं वास्ता मयाः । उकिं यानाः नेपाःया दरवारय् अंग्रेजत धैपिं अवसरवादी खनिं धकाः इपिंप्रति असन्तुष्टि ब्वलनावल (आचार्य, २०६३: २५४) ।

कम्पनी सरकारया गभर्नर जनरल मार्क्विस् कर्नवालिसं (Marquis Cornwallis) नेपाःयात ग्वाहालि याय्गु सुवर्ण अवसरपाखें फाइदा काय्गु तातुनाः विलियम कर्कप्याट्रिकया नेतृत्वय् छगू टोली नेपालय् छ्वयाहय्गु निर्णय यात । तर थ्व हे दथुइ ईसं १७९२ या सेप्टेम्बरय् चीन व नेपाःया सरकारं थःपिनिगु मामिलाय् पिनेयापिसं हस्तक्षेप मयाकेगु बिचाः यानाः शान्ति

सम्झौता यात । कर्कष्याट्रिकया मिशन भारतं नेपाःया लागि प्रस्थान यायन्त्यः हे नेपाल व चीनया दथुइ शान्ति सन्धि जुइधुकुगुलिं २४ अक्टोबर १७९२ स नेपालपाखें कर्कष्याट्रिकयात छ्वयाहय्गु आवश्यकता मन्त धकाः पत्र च्वयाछ्वल । नेपालं गंकगंक नं थःपिनि स्वार्थ दुगुलिं कम्पनी सरकारं कर्कष्याट्रिकया मिशनयात औपचारिक स्वागत यानाबीत इनाप यानाहल । उगु मिशनय् कर्कष्याट्रिकनाप Lieutenant Samuel Scott, Lieutenant W. D. Knox, Lieutenant J. Gerard, Surgeon Adam Freer नं वःगु खः । उगु पुचलय् सिपाहीतय्गु निगू टोलीनापं मौलवी अब्दुल कादीर खान नं वःगु खः । वय्कः मौलवी नेपाः व कम्पनी सरकारया दथुइ व्यापारिक सन्धि जूबलय् वार्ता पुचलय् दुथ्यानाः नेपालय् च्वनावनेधुकूम्ह खः । उबलय् विदेशीतय्त थःगु देसय् दुकालकि इमिसं थनया दक्व परिस्थितिया अध्ययन यानावनी, देसया गोप्य खँ पितयंकी धकाः शंकाया दृष्टिं स्वइगु खः । उकिं कर्कष्याट्रिकपित नेपालय् दुतहःबलय् नं लँ म्हासीकी धकाः ग्यानाः तप्यंगु लँपुं महःसे ताःहाकःगु लँपुं चाःहिकाः हःगु खः । कर्कष्याट्रिकया टोली १३ फेब्रुअरी १७९३ खुन्हु नेपाःया सीमानाय् थ्यंकःवल (लेभी, २००५ः ८४) । बारागढीइ १५ फेब्रुअरीखुन्हु थ्यंकःवल, अनं वय्कःपित नुवाकोट यंकल । नुवाकोटय् ३ मार्चखुन्हु थ्यन । अन कर्कष्याट्रिकं ल्याय्म्हम्ह जुजु रणबहादुर शाह व जुजुया नायबी जुयाच्चम्ह बहादुर शाह नापलात । नुवाकोटय् १५ मार्चतक तयाः स्वनिगलय् यंकल । स्वनिगलय् दुहांवय्धुंकाः टोलीयात मेथाय् मतःसे स्वयम्भूइ तयातल । अन २३ मार्चतक च्वनादिल । कन्हय्खुन्हु २४ मार्चय् स्वनिगः त्वःतावनाः ४ अप्रिलय् सुगौलीइ थ्यंकादिल (स्टिलर, १९९५ः १७६) । कर्कष्याट्रिक नेपाः वयन्त्यः हे नेपाल व चीनया दथुइ शान्ति सन्धि जुइधुकुगुलिं मध्यस्थया भूमिका म्हितेगु

कम्पनी सरकारया अभिष्ट पूमवन । गुगु उद्देश्य ज्वनाः कर्कष्याट्रिक वःगु खः, वबारे छुं हे ज्या याय्म्वाःगुलिं कर्कष्याट्रिकं थःत भूमिकाविहीन महसूस यात । उकिसनं नेपालया सरकारं विदेशी कूटनीतिज्ञयात गुकथं सत्कार याय्माःगु खः उकथं सत्कार-सम्मान मयाःगुलिं अपमानित जूगु ताय्कल । कम्पनी सरकारया गभर्नर जनरल कर्नवालिसयात छ्वःगु पत्रय् कर्कष्याट्रिकं नेपाःया दरवारं थःपित बांलाःगु व्यवहार मयाःगु दुःख प्वंकूसें च्वयातःगु दु - “I had now ascertained with sufficient certainty, that my residence at this court was not to be hoped for” (पृ. ३६५) ।

धुकथं लगभग न्ययन्हु कर्कष्याट्रिक नेपालय् च्वन । उगु न्ययन्हुमध्ये स्वीन्हु लँय् जुइत हे फुत । ल्यंदनिगु नीन्हुमध्ये बाःछि नुवाकोटय् व न्यान्हुति स्वयम्भूइ बितेयात । चीहाकःगु अबधिदुने हे उगु टोलीं नेपालया धर्म, भाषा, सामाजिक अवस्था, प्रशासन, इतिहास, भूगोल आदिबारे आपालं जानकारी मुंकायंकल । उगु जानकारीयात छथासं मुंकाः कर्कष्याट्रिकं कम्पनी सरकारया गभर्नर जनरल कर्नवालिसयात थःगु मिशनया प्रतिवेदन लःल्हात । कर्कष्याट्रिकया मिशनं कम्पनी सरकारयात प्रत्यक्षरूपं फाइदा मजूसं नेपालबारे आपालं जानकारी काय्खन । व हे प्रतिवेदनया आधारय् अंग्रेजतय्सं नेपालनाप कूटनीतिक रणनीति दय्काः सम्बन्ध विस्तार यानायंकूगु खः ।

नेपालया मिशन असफल जुइकाः भारत लिहांवनेधुंकाः कर्कष्याट्रिकं हैदराबादया रेजिडेन्ट जुयाः ज्या यात । वय्कः पर्सियन भाषाय् बांलाक दखल दुम्ह जूगुलिं हैदराबादया निजाम दरवारय् च्वपित प्रभावित याय्त सफल जुल । भारतय् च्वनाः ज्या यानाच्चैच वय्कःयात बाथ ल्वचं कल । बाथ ल्वय्या स्याःचाः कम याय्त अफिम सेवन

यानादिल । ईसं १७९७ स कलकत्ता वनाः गभर्नर जनरलया सचिव जुयाः ज्या यानादिल । थुबलय हे हाकनं छकः कर्कप्याट्रिकं नेपालय वयगु कुतः याःगु खः तर नेपाल सरकारं दुहांवयगु अनुमति मब्यू । रणबहादुर शाहं विसं १८५५ मार्गशीर्ष सुदी १५ रोज १ य दीनानाथ उपाध्याययात च्वःगु पत्रय कर्कप्याट्रिकयात नेपालय हयाः १०० गुणा अप्वः देस विस्तार जुइगु खःसां दुकायमते धकाः निर्देशन ब्यूगु खः (नेपाल, २०५५: १००) ।

बाथया स्याःचाः कम याय्त अफिमया सेवन याःगुलिं कर्कप्याट्रिकया स्वास्थ्य भन्भन् स्यनावन । चिकित्सकतयसं वयकःयात इङ्गलायण्ड लिहांवनेगु सल्लाह बिल । ईसं १८०२ या फेब्रुअरीइ वयकलं भारत त्वःताः थःगु देय इङ्गलायण्ड लिहांभाल । उबलय्तकया दुने बाथ ल्वचं यानाः वयकः अपाङ्ग थें जुइधुकूगु खः । कर्कप्याट्रिकपिसं नेपालय वयाः गुगु सुचं मुकल उकिया उद्देश्य सफू पिकायगु मखु, नेपाःबारे अध्ययन यानाः कम्पनी सरकारयात प्रतिवेदन लःल्हायगु जक खः । अथेसां भारतं बेलायत लिहांवनेधुंकाः कर्कप्याट्रिकं उगु प्रतिवेदनयात सफूया रूप बियाः प्रकाशन यायगु बिचाः यानाः पासापिलिसे सहलह यात । पासापिनिगु सल्लाहकथं 'कोर्ट अफ् डाइरेक्टर'याके सफू प्रकाशनया लागि स्वीकृति फ्वन । अनं सफू प्रकाशन याय्त स्वीकृति वयधुंकाः छम्ह सम्पादकयात नापलानाः थःगु प्रतिवेदनयात सफूया रूपय पिकायजीक परिमार्जन यानाबीत लःल्हानाबिल । तर दुर्भाग्यया खँ, उम्ह सम्पादक आकाभाकां मन्त । वयात गथे ब्यूगु खः अथे हे पाण्डुलिपि लितवल । कर्कप्याट्रिक थः हे नं अपाङ्ग जुइकाः सने हे मफयकाः न्ह्याबलेंया लागि मेचय च्वनाः जिन्दगी हनेमाःगु अवस्थाय् थ्यन । मेगु छुं उपाय मदुसैलि प्रकाशक थःम्हसिनं हे पाण्डुलिपिइ च्वंगु उच्चारण सम्बन्धी छुंछुं अशुद्धियात भिंकाः, अध्याय विभाजनया सामग्रीत

संशोधन यानाः ईसं १८११ स पिकाःगु खः । थ्व सफू नेपाःया इतिहाससम्बन्धी न्हापांगु सफू खः । सफूया भूमिका सुनां च्वःगु धकाः न्ह्यथनातःगु मदु तर कर्कप्याट्रिकं च्वःगु मखु धकाः क्वःछिनाः धायफु । सम्भवतः प्रकाशक हे उगु भूमिका च्वःगु जुइमाः । थःगु सफू पिदंगु स्वयाः ईसं १८१२ स ५८ दँया उमेरय कर्कप्याट्रिक मन्त ।

थुगु सफूया मुखपृष्ठय स्वयम्भूइ च्वंगु प्रताप मल्लं देछाःगु तःग्वःगु वज्रया चित्र तयातःगु दु । सफुली १३ पृष्ठया भूमिकाबाहेक मुक्कं ३८६ पृष्ठ दु । सफूयात ९ गू अध्यायलय ब्वथलातःगु दु । अध्याय १, २, ३ वं ५ य स्वनिगलय दुहांवयगु लँपु, उगु लँपुया दथुइ लाःगु थीथी थाय्बाय, खुसिया वर्णन यानाः वपाखें नेपालं गुकथं ज्या कयाच्वंगु दु धकाः स्पष्ट यानातःगु दु । अध्याय ४ स नेपाःया जमीनया वर्गीकरण, नापतौल, कामदारतयगु तलब आदिबारे वर्णन यानातःगु दु । अध्याय ६ स स्वनिगःया बारे चर्चा यानातःगु दु । थन च्वंगु देगः व कलाकारिता खनाः कर्कप्याट्रिकं “there are nearly as many temples as houses, and as many idols as inhabitants ” (स्वनिगलय गुलि देगः दु उलि हे छैं दु, गुलि दःया मूर्ति दु उलि हे मनू दु) धकाः धयादीगु दु (पृ. १५०) । स्वनिगःया कला-सम्पदाया खँ वइबलय कर्कप्याट्रिकया थ्व धापूयात आपाःसिनं लिसा कयाः धयाच्वंगु दनि । थनया लँ तस्कं चीब्बा जुयाः बनारसय् थें हे फोहोर धकाः नं टिप्पणी यानातःगु दु (पृ. १६०) ।

अध्याय ७ य नेपाःया हावापानी, खानी, जीवजन्तु, कृषि उपज, प्रशासनिक व कानूनी व्यवस्था, कर, सैन्य शक्ति, मुद्रा, भाषाबारे च्वयातःगु दु । नेपालभाषाया लागि दकलय महत्वपूर्ण अध्याय थ्व हे जूगु दु । पृष्ठ २२० व २२१ या दथुइ नेपाललिपिया नमूना बियातःगु दु । अथे हे पृष्ठ २२१ निसं २४९ तक अंग्रेजी खँग्वःया खय्भासं व नेवाःभासं अर्थ बियातःगु दु । थुकी

बियातःगु ६१५ गू अंग्रेजी खँवःमध्ये ५९९ गू खँवःया जक नेवाःभासं अर्थ बियातःगु दु, ल्यंदुगु १६ गू खँवःया नेवाःभासं अर्थ मब्यूसे त्वःतातःगु दु । नेवाःभासं अर्थ बियातःगुली यक्व अशुद्धि खनेदु । सूचना उपलब्ध याकूपिसं पाय्छि हे सूचना ब्यूगु खःसां कर्कप्याट्रिकं मेकथं हे ताय्काः ल्यःबलय् गल्ली जूवंगु खय्फु । प्रकाशनया ल्याखं दकलय् न्हापां नेपालभाषाया खँवःमुना पिदंगु थ्व हे खः ।

अध्याय ८ स कर्कप्याट्रिकं 'नेपाःया ऐतिहासिक रूपरेखा' धकाः छगू वंशावलीया आधारय् नेपाःया इतिहास न्हयब्वयातःगु दु । थुकी नेमुनिनिसं कयाः बहादुर शाहतकया इतिहास बियातःगु दु । कर्कप्याट्रिकं पिकाःगु वंशावली जूगुलिं इतिहासकारतय्सं थुकियात 'कर्कप्याट्रिक वंशावली' नां बियाः छयलाच्चंगु दु । थ्व वंशावली कर्कप्याट्रिकं गन सुयाके काल धकाः स्रोत बियातःगु मदु । इतिहासकारतय्गु धापूकथं थुगु वंशावली व केशर वंशावलीदथुइ आपालं समानता दु । थुगु वंशावली नुवाकोटय् च्वनाच्चंबलय् प्राप्त याःगु खय्माः धकाः अनुमान यानातःगु दु (गौतम, २०५१: ३३९) ।

अध्याय ९ स नेपालया सीमा, नेपालय् दुहांवय्गु अपुगु लँपुया वर्णन यानातःगु दु । नेपालीतय्सं न्हयाक्व हे चाःट्यूगु लँपु जुकाः नेपालय् हःगु खःसां कर्कप्याट्रिकं थः वयागु लँपु लुमकाः लँय् लाःगु थाय्बाय् व गांया वर्णन यानातःगु दु । अध्याय स्वचाय्धुंकाः कर्कप्याट्रिकं थःगु भ्रमण योजनायात तालिकाबद्ध यानाः बियातःगु दु । थुकी वय्कलं छु थासय् गुबलय् ध्यन, उगु थाय् गुलि तापाः, गनथाय् लाः, व थासय् छु खुसि दु, व थाय्या विशेषता छु दु धकाः न्हयथनादीगु दु । सफूया अन्तय् स्वंगू परिशिष्ट बियातःगु दु । परिशिष्ट १ स नेपाल व तिब्बतदथुइ जूगु युद्धबारेया दस्तावेज बियातःगु दुसा परिशिष्ट २

स ११ गू ऐतिहासिक पत्र बियातःगु दु । परिशिष्ट ३ या पृष्ठ ३८० निसं ३८६ तक मल्लकालय् क्रिश्चियन धर्म प्रचार याय्त वःम्ह इटालीया Father Giuseppe या च्वसु 'Account of the Kingdom of Nepal' या छु अंश दुथ्याकातःगु दु ।

नेपाःया इतिहास अध्ययन याय्त थ्व सफू अतिकं महत्वपूर्ण जूगु दु । पृथ्वीनारायण शाहं किपूमितय्गु न्हाय् ध्यंगु खःकि मखु धकाः वादविवाद जुयाच्चंगु दनि । कर्कप्याट्रिकं पृ. १६४ स थ्वबारे छता रोचक खँ च्वयावंगु दु -

The reduction of this place (Kirtipur) cost the Ghoorkhali so much trouble, that in resentment of the resistance made by the inhabitants, he (Prithvi Narayan Shah) barbarously caused all the males he captured in it, to be deprived of their noses. We came to the knowledge of this fact in consequence of observing among the porters who transported our baggage over the hills, a remarkable number of noseless men, the singularity of the circumstance leading us to inquire into the cause of it.

कर्कप्याट्रिकं पृथ्वीनारायण शाहया बर्बरताया शिकार जुयाः न्हाय् मदय्काः च्वनेमाःपिं किपूमित उल्लेख्य संख्याय् नापलाःगु तथ्ययात सुनां नं सुचुकां सुचुकेफइमखु । थुकथं अतिकं महत्वपूर्ण तथ्य दुगु सफू खःसां थुकी छता-निता गल्ली जुयाच्चंगु दु । पृथ्वीनारायण शाहनाप ल्वाय्त ख्वपया जुजु रणजित मल्लं इष्ट-इण्डिया कम्पनीयाके ग्वाहालि फ्वंबलय् कप्तान किनलकया नेतृत्वय् अंग्रेज सैनिकतय्गु फौज नेपालय् वःगु धकाः च्वयातःगु दु (पृ. २७०) । तर इष्ट-इण्डिया कम्पनीयाके ग्वाहालि फ्वंम्ह ख्वपया जुजु रणजित मल्ल मखु, यँया जुजु जयप्रकाश मल्ल खः । पृथ्वीनारायण शाहं स्वनिगः कब्जा याःगु मिति ईसं १७६८ धकाः बियातःगु

(पृ. २७०) नं पाय्छि मजू । पृथ्वीनारायण शाह यें कब्जा या:गु २५ सेप्टेम्बर १७६८ (विसं १८२५ असोज १३ गते) ख:सा यल कब्जा या:गु ६ अक्टोबर १७६८ (विसं १८२५ असोज २४ गते) ख: । तर ख्वप कब्जा या:गु मिति १२ नोवेम्बर १७६९ (विसं १८२६ मंसीर १ गते) ख: । थुकथं स्वनिग: कब्जा या:गु मिति ईसं १७६९ जुइमा:गु खनेदु । अथे हे पृथ्वीनारायण शाह सीगु मिति ईसं १७७१ (पृ. २७१) व प्रतापसिंह शाह सीगु मिति ईसं १७७५ (पृ. २७२) धका: बियात:गु नं पाय्छि मजू । वास्तव्य ११ जनवरी १७७५ (विसं १८३१ माघ १ गते) खुन्हु पृथ्वीनारायण शाह सीगु ख:सा १७ नोवेम्बर १७७७ (विसं १८३४ मार्ग ६ गते) खुन्हु प्रतापसिंह शाह सीगु ख: ।

नेवा: मिसातय्गु बारे कर्कप्याट्रिकं न्यथनात:गु छगू वाक्यं नं आपालं भ्रम न्यंकाच्वंगु दु । वय्कलं पृ. १८७ स च्यादीगु दु - “The Newar Women, like those among the Nairs, many, in fact, have as many husbands as they please, being at liberty to divorce them continually on the slightest pretences” (नेवा: मिसातय् नं नायरतय् थें हे गुलि मंदु उलि भा:त तयदु, चिचीधंगु खँय हे सम्बन्ध विच्छेद याय्गु स्वतन्त्रता दु) । कर्कप्याट्रिकं च्व:गु थ्व हे वाक्ययात ब्रम्हवाक्य नाला: नृतत्वशास्त्रीतय्सं (विशेष याना: गोपालसिंह नेपाली) दक्षिण भारतया नायर जातिपाखें नेवा:त व:गु ख: धका: व्याख्या या:गु दु । आपालं अनुसन्धानधुंका: आ: वया: नायर व नेवा:दथुइ स्वापू मदुगु तथ्य प्रमाणित जुइधुंकूगु दु ।

थुकथं कर्कप्याट्रिकया नेपालय् दुहांवय्गुया ल्युने त:धंगु हे स्वार्थ सुलाच्वंगु दुसां, नेपालबारे जानकारी मुंका: कम्पनी सरकारयात प्रतिवेदन ल:ल्हाय्त हे सूचना मुंकूगु ख:सां वय्कलं च्यादीगु खँ अतिकं मूल्यवान् जुयाव्यूगु

दु । नेपालया इतिहास, भूगोल, प्रकृति, लँपु आदिबारे वैज्ञानिकरूपं च्यात:गु थुगु सफू तत्कालीन नेपालबारे थुइकेत अतिकं महत्वपूर्ण स्रोत जूगु दु । उगु ईया नेवा:तय्गु सामाजिक जनजीवन थुइकेत, नेवा: वास्तु, नेपालभाषाया अध्ययन याय्त नं थ्व सफू ब्वने हे मा: ।

## लिधंसा

आचार्य, बाबुराम, विसं २०६३, *नेपालको संक्षिप्त वृत्तान्त* (निगूगु संस्करण) । यें : श्रीकृष्ण आचार्य ।

गौतम, राजेश, विसं २०५१, *इतिहास लेखनको इतिहास* । यें : रत्न पुस्तक भण्डार ।

नेपाल, ज्ञानमणि, विसं २०५५, *नेपालनिरूपण* । यें : नेपाल राजकीय प्रज्ञा-प्रतिष्ठान ।

लेभी, सिल्भा, ईसं २००५, *नेपाल : हिन्दू अधिराज्यको इतिहास* (न्हापांगु ब्व) । अनुवादक : डिल्लीराज उप्रेती । ललितपुर : हिमाल किताब । न्हापाखुसि ईसं १९०५ स फ्रान्सेली भासं पिहांव:गु ।

शास्त्री, उदयवीर (अनु.), ईसं २००१, *कौटलीय अर्थशास्त्र* (पुनर्मुद्रित) । नई दिल्ली : मेहरचन्द लछमनदास पब्लिकेशन्स ।

Amatya, Saphalya, 1969, 'British Diplomacy and its Various Mission in Nepal from 1767 to 1799,' *Ancient Nepal*, 6: 1-5.

Dalrymple, William, 2002, *White Mughals: Love and betrayal in Eighteen Century India*. London: Penguin Books.

Kirkpatrick, 1986, *An Account of the Kingdom of Nepaul*. Reprint. New Delhi: Asian Educational Services. First Published in 1811.

Stiller, Ludwig F., 1995, *The Rise of House of Gorkha*. Revised Edition. Kathmandu: Human Resources Development Research Center.

कर्कप्याट्रिक बियात:गु नेपाललिपिबा नमूना


*The Newar Alphabet*

क ख ग घ ङ च छ ज झ ञ ट ठ ड ढ ण त थ द ध न णि

प फ ब व य र ल ञ म णि क ङ

ङ ङ म णि ङ ङ ङ ङ ङ ङ ङ ङ ङ ङ ङ ङ ङ

## ककप्यादिकया सफू



ककप्यादिकया कषा (साभार : Dalrymple, 2002)

